




STIECHTING  
DE TEMPELEERS  
MESTREECH  
JAORVERSLAAG  
1997-1998



STIECHTING  
DE TEMPELEERS  
MESTREECH  
JAORVERSLAAG  
1997-1998

## Inhaajd

Proloog.....	3
Kelender 1998.....	4
Vastelaovendsleedsje.....	5
Jaorvergadering.....	7
Protektäörs.....	9
Sjoggelemint.....	10
Oetrope Stadsprins.....	12
Jaorvergadering Zaate Herremeniekkes.....	15
Prinsezittinge.....	16
Prinsebal.....	18
Medaaljes.....	20
Gezètte.....	21
Nostallegasie.....	22
Vastelaovend veur de kinder.....	23
Vastelaovendskonzèr (LSO).....	25
Klevarie.....	26
de Kachelpiepers.....	27
Inhole.....	28
't Stadhoes.....	30
Vastelaovendszoondag.....	34
Vastelaovendsmaondag.....	36
Vastelaovendsdinsdag.....	37
De lèste minute.....	39
In Memoriam.....	40
De Tempeleers organisatie.....	42
Epiloog.....	46
Advertentie Bouwburo Beenkens.....	47
Colofon.....	48

## Proloog

11 november 1998

Alweer is e jaor veurbijj. Eve zeuke veer e momint um trök te kieke wie de Vastelaovend waor.

Zoe zalle veer us de Vastelaovend 1998 oongetwiefeld blieve rappelere es de Vastelaovend vaan de veranderinge.

De reklaam-optoch verdween, de zittinge woorte weer in 't Vastelaovendsprogram opgenome, d'r kaom 'ne nuije sirremoniemeister, 't Kachelpieperscorps woort oetgebrijd mèt 'n aontal dames.

Veur uuch ligk e verslaag vaan 't Vastelaovendsgebäöre in de perjood vaan november 1997 tot november 1998, aofgewisseld mèt de nudige fotoos.

Mèt vööl plezeer höb iech aon dit jaorverslaag gewèrrek en iech hoop tot geer uuch, aon de hand vaan dit jaorverslaag, mèt eve vööl plezeer de Vastelaovend 1998 zalt blieve rappelere.

Tempeleer  
Nico Kempeners

## de Kelender 1998

Waar 't samestèlle vaan de kelender 1997 "lèste-minute-werrek", in 1998 woort dat good gemaak door al op 10 september (!) op de bel-etage vaan 't VVV aon de Kleine Staat de kelender 1998 te prizzentere.

En of dat nog neet genóg waar, woort dat ouch nog 'ne kelender mèt 'ne louptied vaan 11 november 1997 tot en mèt 31 december 1998.

De aonwezige waoren 't metein eins: de kelender, veurzeen vaan sjèlderije vaan Schaepkens (besjikbaar gestèld door dr. E. v.d. Heyden), waar e zjuwielke.

Naogenóg de ganse veurraad woort daan ouch verkoch.

De ierste eksemplare woorte aongeboje aon us hoedoeve Bep Cohen, Bertsje Thewissen en Alda Quaring, aongezien dees driij dames es geinen aandere wete wat 't wèlt zegke um 'ne Tempeleerskelender same te stèlle en oet te bringe.

In dees driij dames iere veer hunne maan zaoliger, dee ziech es Tempeleer jaorelaank veur de kelender heet ingezet. Oonder 't genot vaan 'n hepke en 'n drenkske kraoge alle aonwezige nog de kans um de zjus gebore kelender te bewoondere en nog get nao te kaarte euver dit sjoen stökske Vastelaovendstradisie.



## 't Vastelaovendsleedsje 1998

Zoondag 9 november 1997

In 'n groete tent, opgeboud op de plaots vaan de aw bösstasie aon de Spoorweeglaan, waore al wied veur aonvaank vaan 't program weer vööl luij prizzent.

De seleksiekemissie had oet 'n aanbod vaan 41 leedsjes, 7 nommers gekoze um dao-oet door 't publiek dàt leedsje te laote keze wat wierdig waar um es Vastelaovendsleedsje 1998 door 't leve te goon.

Nao de ierste runde woorte 1199 geldige stumme oetgebrach en bleve euver veur de finale: "Mörgevreg", "Laot d'n tap mer loupe", "Lewie gief e rundsje" en "Meh m'ne jong ...iech drej weer door".

Bij de tweede stumrunde woorte nog 1142 geldige stumme oetgebrach die es volg woorte verdeild:

op de veerde plaots mèt 87 stumme: "Lewie gief e rundsje"

op de derde plaots mèt 127 stumme: "Laot d'n tap mer loupe"

op de tweede plaots mèt 171 stumme: "Meh m'ne jong ...iech drej weer door" en

op de ierste plaots mèt 757 (!) stumme en daomèt winner veur de Vastelaovend 1998: "Mörgevreg".



Veur d'n derde kier op rij waore Peter Ruyters (teks) en Marc Quaaden (meziek) de winners.

John Thoma eindigde op de tweede plaats en zaog same mèt de winners zie leedsje op de Vastelaovends-c.d. geplaoets.

MÖRGEVREUG wäörd: Peter Ruyters meziek: Marc Quaaden

refrein

Meh mörgevreug is alles anders  
Daan staon iech speulenteer veuraon  
Jao mörgevreug daan geit 't beter  
Daan gaon iech achter eder hermenieke aon  
Mörgevreug is alles anders  
Dat gief m'ch nuie mood  
En nao m'n ierste gleeske beer  
krijg iech sjevraoje  
meh toch drink iech mèt plezeer

couplèt

Iech höb al ore laank  
gaar gei gevoel mie in mien bein  
iech moot nao hoes tow loupe  
meh m'n sjeun die zien te klein  
de kaffees die zien tow  
en zuug de nach is haos veurbij  
hei staon iech noe gesjmink, verkleid  
mieljaar wat daon iech hei?  
Mestreech dat ligk al ore op 'n oer  
dee vastelaovend vèlt miech erg zwoer

## De Jaorvergadering

16 november 1997

De prizzedent opende de jaorvergadering mèt 't memorere vaan 'n aontal luij die us in 't aofgeloupe jaor zien oontvalle: Paul Batta, dee 35 jaor laank es Tempeleer aon us organisatie verboonde waor, Aajd-Stadsprins en Iere-Tempeleer Leon Schreuder dee al sinds 1936 bij de Mestreechter Vastelaovend betrokke waor, us hoesdaeve Bets Hoorens, Truus v. Lijf en Berthie Thewissen en uzze börgermètwerker Pie Bours dee 30 jaor laank 't maggezijn beheerde en min of mie es zien tweede toes besjouwde. Jan Janssen en Willy Fey kaome achtereinvolges aon de beurt um respektievelik 't jaorverslaag en 'n euverziech vaan de duite te prizzentere. Ouch woort de Vastelaovendsvierder 1997 bekind gemaak. E koppel dit kier: Menno Eisenga en Yvonne Vromen. Bekindheid kraoge zie mèt hun kreasie es Reus Gigantius. Meh ouch es Pinokkio trokke zie vääöl bekiaks.

E woord vaan daank, onderstrijp mèt e blömke, woort oetgesproke in de riehting vaan 't ex-prinselik paar Peter en Marga Schrijen. Oonder leijing vaan Prins Peter I beleefde Mestreech 'ne fantastiese Vastelaovend. Vaan Bert Beenkens woort afsjeid genome es sirremoniemeister. Nao 11 jaor voont heer d'n tied gekoume um 't "stekske" door te geve. Es daank veur zie werrek kraog heer oet han vaan de prizzedent, es blievend aondinke, de sirremoniemeistersstek aongeboje. Dit gebaar woort mèt e groet applaus vaanoet de zaol onderstrijp.



Es de sirremoniemeister afsjeid nump, kin 't neet anders es tot d'r ouch 'ne nuije sirremoniemeister kump. Es opvolger vaan Bert Beenkens woort Jan Janssen beneump en offesjeel aon 't vollek veurgestèld. De jaorvergadering góng wijjer mèt de installasie vaan veer nuij Tempeleers: Lon Cimmermans, dee aon de P.R. kemissie weurt towgevoog, Han Hoogma, veurbestump um de kemissie Boetegebäore te versterreke, Henk de Jong en Lucien Schreurs die alletwie bij de kemissie Binnegebäore weurde ingezet. Hun dames woorte op veurhand al bedaank mèt e blömke veur d'n tied tot zie hunne maan mote misse veur de Mestreechter Vastelaovend. Naotot ouch nog informasie waar verstrekk euver de veuroetzichte veur de Vastelaovend 1998, woorte Peter Ruyters en Marc Quaaden gefêteerd mèt hun derde euverwinning op rijj vaan 't Vastelaovends-leedsjeskonkoer. Veur de dames waore dit kier de blomme wel op tied prizzent.



## Protektäörs

Maondag 17 november 1997

Tijdens 'n zier stijlvol bijeinkoms in Chateau Neercanne woort afsjeid genome vaan uzze protektäör Gerard Brouwers. Nao 't inlievere vaan de protektäörplakkèt en e woord vaan daank vaan de prizzedent aon d'n hier Gerard Brouwers, onderstriept mèt e blömke veur mevrouw Brouwers, woorte twie nuij protektäörs geïnstalleerd, d'n hier Peter van Dongen Torman vaan de Ridderbrouwerij en d'n hier Huub Nijhuis vaan de Rabobaank Mestreech.

Bijj aofwezigheid vaan de veurzitter vaan 't Protektäörskolleze, d'n hier börgemeister Ph. Houben, naom protektäör Theo Westgeest zien taak ad hoc euver en leet 't gans gezèlsjap in 'n zier humorvol speech weite tot de nuij protektäörs vaan harte welkom zien. Veur de prizzedent waar toen de iervol taak weggelag um de twie protektäörs de plakkèt um te haange en hun dames e blömke te offerere. Protektäör Karl Dittrich sloot 't offesjeel gedeilte aof mèt 'ne komplette one-man-show boe in heer 'n steunbetuiging aon de Tempeleers oetspraak naomes al zien kollega-protektäörs. Veurtot d'n aovend op 'n informeel meneer wijjer góng, naom de keersveerse protektäör Huub Nijhuis de gelegenheid te baat um 'ne cheque vaan f 11.000,- aon te beje naomes de Rabobaank, mèt daobij de belangrieke mètdeiling tot dit gein einmaolige aksie waar. Veur uzzen habsjaar kós d'n aovend toen neet mie kepot.



## Sjoggelemint 1998

Zoondag 23 november 1997

D'r weurt wel ins gezag tot es in Mestreech get twee kier gebäört 't 'n tradisie is. Es me daobij ouch nog bekiek tot 't bezeugersaantal, ten opzichte vaan 't ierste Sjoggelemint, verdobbelde tot ± 400 lui, daan kin mèt rech gezag weurde tot Mestreech weer 'n tradisie rieker is.

In e prachtig verseerd Keplaon Lochmanhoes in Lummel woort in 'ne goojen ambiance 'n aantal welskes ten gehure gebrach door 't Duo Ammezasië.

Nao tilling vaan de stumme bleek tot 't Sjoggelemint twee winners had opgelieverd:

"Sjans" vaan Patrick Ummels en Philippe Reuser en  
 "Pak miech vas en drej mèt miech" vaan John Thoma.

### Sjans

refrein

geef mie toch dee kans  
 daan wals iech hei mèt diech deen dans  
 iech wèl diech vaan ze leve gaaroet neet mie kwiet  
 geef miech toch dee kans  
 iech höb toch zeker wel get sjans  
 iech wèl diech e puneke geve  
 't is d'n hoegsten tied

koeplèt

iech kin diech nog vaan vreuger  
 meh dat wèts diech neet mie  
 veer dansde toen e welske  
 en diech zags toen merci  
 meh dat is toen niks gewore  
 daovaan höb iech noe nog spiet  
 noe kom gaw in mien errem  
 iech wèl diech veur altied



### Pak miech vas en drej mèt miech

refrein

Pak miech vas en drej mèt miech  
 iech dans daan dee wals mèt diech  
 'n linker en 'n rechterhand  
 same noe aon eine kant  
 't liefste in de drei-kwaartsmat  
 dans iech miech gans oet de naod  
 't walse zit m'ch in 't blood  
 es iech wals daan veul iech miech zoe good


koeplèt

iech hoof geine foxtrot en ouch geine cha-cha  
 iech dans neet d'n disco en neet de lambada  
 meh bij 't hure vaan de wals  
 griep iech weer miene kans  
 op 'n wolk veul iech miech  
 es iech daan zweef mèt diech.

## Oetrope Stadsprins

Zoondag 25 jannewarie 1998

Oonder 't motto "de Lanteriemennekes koume ..." woort de groeten oonbekinde Hoeglöstigheid, vermomp es brannende boezjie, vaanaof de Spoorweeglaon, dweers door Wiek nao de Merret gebrach. D'n oetroopwagel, prachtig ineingefisternöld door de mètwerkers vaan 't Tempeleersmaggezijn, woort veuraofgegaange door 'n gróp evermennekes/lanteriemennekes. Oppe Merret stoonte doezende luij te wachte, benuijd wee wierdig bevoonde waor um veur te goon in de Mestreechter Vastelaovend. 't Vollek vaan Mestreech kraog iers nog de gelegenheid afsjeid te numme vaan Prins Peter I vaan 1997 en zien Prinses Marga. Oonder 'n hëls kabaal vaan al wat meziek kós make woort de Groeten Oonbekinde verlos vaan zien vermomming en stoont dao de nuije Hoeglöstigheid, Tom I (Gilissen) oet Hier. Heer is getrouwd mèt Marie-José Koekkelkoren en same höbbe zie twie kinder, dochter Anique en zoon Raymond. De nuije Hoeglöstigheid is es vennoot verboonde aon 't makeleerskentoer Pustjens en verdeent dao zie broed mèt de koup



en verkoup vaan hoezer. Nao 't oetrope volgde 'n ierste kinnesmaging mèt de Samewèrkende Mestreechse Vastelaovendsvereniging in de Festi-Village. En Mestreech zow Mestreech neet zien es 't oetrope vaan 'ne nuije Prins neet gevierd kós weurde. Tot in de late eurkes waore de kaffees bomvol.







#### MAKELARICUS TAXATORICUS HYPOTHERICUS

1. Gevolmachtig Consul in 't Hierder Brook
2. Baron van Groonsveld
3. Geheim Zegelbewaarder van de Zonneberg
4. Lienhier van 't Jekerdal
5. Groet-regelatäör van de Joppenhof
6. Conservator van 't aajd Hierder Raodhoes
7. Erfprins van 't Plateau Saint Pierre
8. Graof van Belfort
9. Iere-Regent van 't Hertepark en d'n Eendevijver
10. Drappo-Kommendant van alle Zate Herremeniekies
11. Protektäör van de Mestreechter Vastelaovend

## Jaorvergadering Zate Herremeniekies op Fort St. Pieter

26 jannewarie 1998

Tradisiegetrouw voont d'n daag nao 't oetrope van de nuije Stadsprins de jaorvergadering plaots van de Zate Herremeniekies. Um haaf zeve in de vreugen avond stoonte de ierste luij al veur de deur van 't Fort St. Pieter um verzekerd te zien van 'n gooj plaots. Wie um èllef minute nao ach de jaorvergadering geopend woort, barsde 't Fort haos oet z'n voge. Herremenieke Um te Jenke had 'ne brief gesjreve aon de wèthawwer van o.a. Verkier, Armand Cremers. Daorin woort gepleit um neve de O.V.-as (Openbaar Vervoer as) ouch te zörrege veur 'n Z.H.-as veur de Zate Herremeniekies. Um te Jenke is bang tot bij de oetveuring van de Maos-Merret-planne 't look van de Merret weurd touwgemetseld en daomèt d'n doorgaank veur de zate herremeniekies nao Wiek weurt geblokkeerd. De wèthawwer maakde van de gelegenheid gebruik um e weerwoord te geve en verklaorde ziech akkoord mèt 't veurstèl van Um te Jenke. Um haaf nege woort d'n Hoeglöstigheid Tom I welkom geheite. Prins Tom I waor d'r vas van euvertuig tot Vastelaovend 1998 'ne hiele gooje vastelaovend zow weurde dankzij de zier enthousiasten inzate van de zate herremeniekies. Veur de poos, heel de Limburgse buutekampioen Huub Stassen nog 'n fantastiese buut en kraog daomèt de ganse zaol plat. Nao de poos, wie 't Hoeglöstigheid gezèlsjap alweer op weeg waor nao de volgende viziet, woort geloot veur de zjuste volgorde van opkoms bij 't konkoer op Vastelaovendsdinsdag. D'n oetslaag van de belangriekste nommers waor:

nr. 1 : Sous Bras Band Tête de Veau (kraoge 'n ontbijt oppe Vriethof aongeboje)

nr. 11: Herremenoetsmie (hadde de ier um de meziek tijdens de volgende jaorvergadering te verzörrege) umtot zie dat al ins gedoon hadde gaove ze de ier door aon:

nr. 22: O Solo Mio (Annie v. Loo), Annie verzekerde ziech van assistensie door:

nr. 33: Blamaasj.

Annie van Loo en de Belzje Zjenderreme maakde van de roondvraag gebruik um nog get twiefel en onrös te zeije mèt 'ne stoomp weurs. Wie de weurs evels verdeild waor, waor ouch 't aongekaart probleem opgelos.

De vergadering woort beslote mèt de vertuining van 'ne videoband van 't ZHK 1997.



## Prinsezittinge

30 - 31 jannewarie en 1 fibberwarie 1998

Oonder 't motto "Mestreech geit plat" woorte de ierste zittinge aongekondeg in de peers. Meh veurtot de ierste Prinsezitting sinds zès jaor weer kos plaatsvinde, waor dao 't nudig ge-ensel aon veuraof gegaange. D'n eine voont de zaol te klein, d'n aandere te hoeg, weer 'nen aandere te wied eweg vaan de Vriethof um nog mer te zwiege euver de diskussies wie de opstèlling vaan de steul moos zien en wiewäöl bezoekers in de zaol kóste. Meh op vriedag 30 jannewarie waor 't daan toch zoe wied. De bezoekers vaan de ierste zitting woorte bij binnekoms al gekonfronteerd mèt 'ne ploog bouwvakkers die nog drök aon't wèrrek waore. Diezelfde bouwvakkers zörregde evels ouch deveur tot de luij allemaol nao hun plaotse gebrach woorte.



Sirremoniemeister Jan Janssen kondigde op de häöm bekinde en humorvol meneer alle artieste aon. Zoe kraoge veer o.a. te zien en te hure: de buutereedners Huub Stassen en Ger Frenken, de parodiegróp Rebarber Tiesj oet Panningen, 't dansmamzélke Kim v. Deursen en 't Duo Oetgeslaope'. 't Mestreechselemint waor



oongetwiefeld 't hoegtepunt vaan de zittinge. In 'ne perfekte show vaan ongeveer driij keteer prizenteerde ziech 'n kääor vaan Mestreechter artieste mèt meziek, dans, veurdrach en akrobatiek. De zittingekemissie, oonder leijing vaan Willy Hageman, bezörregde Mestreech weer e sjoen oonderdeel op de vastelaovendskelender debijj.



## Prinsebal

Zaoterdag 7 fibberwarie 1998

Aof en aon rijdende otoos en taksies lieverde allemaol eve sjiëk gekleijde luij aof bijj 't MECC, 't jaorliks Prinsebal voont weer plaots.

En tradisiegetrouw woorte de balgaste oontvaange door 'ne Raod vaan Èllef. Salonorkes Wilfried Stassen zörregde veur d'n achtergrondmeziek en ouch 't welkomdsdrenkske oontbraok neet. Tege nege oor begós 't bal en späölde de twee orkeste Swing Design en Sound Revolution aofwisselend de stare vaan d'n hiemel. Oonder muzikaal begeleiding vaan de Kachelpiepers en veuraofgegaange door zien veurgengers de Aajd-Stadsprinse, maakde Ziene Hoegen Hoeglöstigheid Prins Tom I um haaf tien ziene zwajeuzen entree same mèt zien Prinses Zjé. Nao de gebruikelike prinselike wäörd en e blömke veur de Prinses, woort 't hoeglöstig koppel op d'n dansvloer gevraog veur d'n openingsdans.

Al gaw voogde ziech de Aajd-Stadsprinse mèt hun Prinsesse daobijj.

In 'ne manjefiek verseerde balzaol genote de ± 1300 balgaste oonder 't genot vaan 'n hepke, 'n denske en 'n drenkske tot laat in de nach, of wie geer wèlt tot vreug in de mörrege, vaan dit prinselik evinnemint.



## Medaaljes

Veur de vastelaovend 1998 had de Kanselarijraad gekoze veur de volgende medaaljes:

De Prinseorde: 't Lanteriemenneke, es hommaasj aon de maan dee in vreuger tijje mèt zie lèdderke door de straote vaan de binnestad trok um mèt e spinsleech de gaaslanteries aon te steke.

De Tempeleersorde: de Vastelaovendskis, te vinde op vääol Mestreechter zolders gevöld mèt vastelaovendspekskes, sjminkdoeze, remmelkes en alles wat nog mie nudig is um de vastelaovend te viere.



De Tempeleersorde kint de gradasies: Ridder, Offeseer, Kommandäör en Groet-Offeseer.

En netuurlik waor d'r ouch weer de kindermedaalje " 't Mestreechter Klojnske".

Veur us Steunpilere (es mèt f 111,11 of mie de vastelaovend weurt ondersteund) waor d'r wie geweest weer 'n manjefieke plakkèt.

Es aofgeleijde vaan 't motto vaan de aofgeloupe Heiligdomsvaart "Boe bis Diech?", waor dit jaor gekoze veur 't motto: "Heij bin iech" mèt daobij 'n aofbeelding vaan de Platte Zaol op de plakkèt.

## De Gezette

Op 21 jannewarie woort hoes aon hoes de info-gezèt bij de luij in de bös geduijd. Dao-in kós me leze wat allemaol stoont te gebäöre mèt de Vastelaovend. Ruim aondach waor d'r veur de nuije sirremoniemeister en ouch veur de Prinsezittinge. Wijjer woort ouch nog ins oet de deuk gedoon wie Mestreech eder jaor aon z'ne Prins kump.

De kinderaktiviteite woorte oetgebrijd touwgeliëch, jammers wee de jäög heet, heet de touwkoms !!

Us vastelaovendsgezèt, d'n Tempeleer, woort dit jaor op 10 fibberwarie in 'n bomvol Bonbonnière oetgereik.

Kaffee 't Pruske woort ge-ierd mèt de "Noskaar", de pries veur de bèste vastelaovends-advertensie.

't Tempeleersvläöjke woort oetgereik aon 't MECC vaanwege hun 10-jaorig bestoon en 't feit tot 't MECC in al die jaore 'n wezlike bijdraog gelieverd heet aon de promotie vaan Mestreech door middel vaan eksposities, congresse, bäärze en zoe mie.



## Nostallegasie

Ouch dit kier waor weer alles in 't werrek gestèld um in de Festi-Village get bezunders te make vaan de Nostallegasie.

D'n tendens tot ganse gróppe/femilies nao de nostallegasie koume, is 'n teike tot 't fles leef onder vastelaovendvierend Mestreech. Ouch noe bleek weer wiewäöl tied gspendeerd waor aon 't make vaan de mies fantastiese kreasies.

Me zaog 'n aontal oet 't kloester weggeloupe nonne, e "medies team" verriechede gratis onderzeuke, indiane kompleet mèt totempaol, 'ne sjeik mèt zienen harem, chineze, klojns, eskimoos en nog vääöl mie.

't Geleheidsorkès " 't Mestreechs Vastelaovends Orkes" späölde de stare vaan d'n hiemel en zoewel Ziesjoem! es

't Duo Ammezasia zatte de tent op z'ne kop. 't Waor e geweldig fles en gelèt op de reaksies zier de meujte weerd um door te goon.



## Vastelaovend veur de kinder

Wee de jäg heet, heet de touwkoms. De Vastelaovend in Mestreech is daorum neet kompleet zoonder de versjèllende aktiviteite veur de kinder. Es ierste waor dao d'n teikenwedstrijd, al dèk die benaoming neet mie gans de laojing es me zaog wat allemaol aon prachtige werkstökker nao de Festi-Village gebrach woorte. Liefs 17 sjaole doge mèt en de zjurie had 't daan ouch neet gemekelik um de prijze touw te kinne. Eigelik is 't spietig tot al die werkstökker mer zoe kort te beziechtige zien. 't Bonnefantemuseum zouw daomèt 'n sjoen ekspozisie kinne inriechte.

Nao d'n teikenwedstrijd stont de Kindermiddag op 't program.

Op zondag 15 fibberwarie kraakde de Festi-Village oet häör voge. Mie es 1000 luij bezukde 't kinderfies boe optrejjes verzörreg woorte door 'ne goocheleer, 'ne klojn, de Kachelpiepers, 'e dansgruupke en boe de meziek weer verzörreg woort door Vreug en Neugter. Veur de alderkleinste waor 'ne peuterhook ingeriech.

Kepot meuj meh kontent euver 't verloup vaan de middag kóste alle vrijwèlligers trök kieke op e zier geslaag kinderfies.

Op Vastelaovendsdinsdag woort tradisiegetrouw weer de Kestuumwedstrijd gehawwe veur de kinder. En ouch bij dit evinnemint leep 't aontal bezoekers riechting de 1000. De kinder lepe es vollierde mannequins euver de loupplank um ziech vaan alle kante te laote bekieke en dao boe nudig hun vastelaovendspekske vaan 'n touwliechting te veurzien veur 't geval tot de zjurie 't eve neet mie zouw wete wat 't allemaol mós veurstèlle.




En neve de loupplaank, minstens eve zoe intressant, de grutse geziechte vaan peer en meer, ama en ampa es hun (klein)keend dao paradeerde. Dit festijn kraog nao de vastelaovend nog e vervolleg mèt de priesoetreiking op zaaterdag 28 fibberwarie. In 't vereinigingslokaal vaan de Stadssjötterij kóste de kinder 'n kääs make oet de mies fantastiese prijze.



## Vastelaovendskonzèr

Dinsdag 17 fibberwarie: D'n Tejater aon de Vriethof leep weer vol. Veur de 4 x 11 + 1e kier verzörregde 't L.S.O. 't Vastelaovendskonzèr. Volges 't programmabeukske stoot us e karnavalesk program te wachte. Es dirrizjent waor aongezek d'n hier Michel Bergenhuizen, 'ne jong oet Groonsveld dee al jaore laank es fagotspeuler aon 't L.S.O. verboonde is. De soliste waore: Helmut Bottirotti, Wim Steinbusch, de Wöllemkes en de Spats Company Dancers. Wie geweend begós 't program mèt d'n Trumpet Voluntary vaan J. Clarke. Op de toene vaan dit sjoen stök meziek kaome d'n Hoeglöstigheid mèt de Tempeliers nao binne. Veur de poos kraog 't pebliek stökker te hure vaan Rossini, Ibert en Punto um aof te slete mèt 'n arranzjemint vaan Michel Bergenhuizen, vertolk door de Wöllemkes boebij ummers in alle kleure en maote 'n groete rol späölde. Veurtot eederein ziech kós goon lave aon de koffie, 't beer of nog get aanders, voont nog 'n sirremonie protokolair plaots boebij versjeije luij 'n prinselike dikkerasie kraoge opgespangk. Nao de poos woorte de nege symfonieje vaan Beethoven in nege menute op 'n virtuoos meneaonein gespäöld. Wijer kóste veer genete vaan stökker vaan o.a. Schönberg en Sartoni, mèt solisties optrejje vaan Helmut Bottirotti. D'n aovend woort beslote mèt de Stars and Stripes vaan P. Sousa. Netuurlik kaom 't L.S.O. neet vaan de bühn aof zonder 'n touwgif. 't Waor weer awwerwèts gezèlleg dankzij 't geweldig optrejje vaan us LSO.



## Klevarie

19 fibberwarie 1998

De Vastelaovend hingk vaan tradisies aonein en ein vaan die tradisies is de zitting op Klevarie op d'n donderdagaovend veur Vastelaovend.

Veur de luijkes die us jaorelaank de vastelaovend mèt de papepel hōbbe ingegeve en noe, spietig genóg, zellef neet mie mèt kinne doen, is 't vaan groete importansie tot veer noe de vastelaovend bij hun bringe.

Netuurlik waore ouch dit kier d'n Hoeglöstigheid mèt zien Tempeleers daobij prizzent.

En zjus wie zien veurgengers kraog ouch Prins Tom I 'n aondinke aongeboje vaan de bewoeners vaan Klevarie.

'n Käär vaan Mestreechse artieste stoont in de rijj um op te trejje en allemaol voonte ze 't 'n ier um in Klevarie op de bühn te mage stoon.

'n Aontal Tempeleers naom nog eve de rol vaan orkes euver en bij 't optrejje vaan Beppie Kraft woort nog 'n Tempeleers-achtergrond-koer gevörmp. De luij in de zaol voonte 't prachtig en dao is 't jammers toch um te doen.

Wie de bewoeners vaan Klevarie weer trök nao hun kamers gebrach woorte, góng Prins Tom I en zien Tempeleers nog nao 't bestuursgedeilte vaan Klevarie veur 'n oontvangs bij 't Bestuur vaan de Elisabeth Strouvenstiechting. En boe d'n habsjaar mesjiens stēllekes op had gehoop, gebäörde, de Tempeleers kraoge 'ne sjoene cheque aongeboje. 'n Geste die zier op pries woort gestēld.



## De Kachelpiepers

Nao bijnao 47 jaor zonder dames, mèt oetzundering vaan de merketenster, hun optrejjes te hōbbe verzörreg, sjrieve de Kachelpiepers noe historie.

In 'nen oproop um nuij lede te kriege woort mèt naodrök gemeld tot ouch dames welkom waore bij de meziekafdeiling. En woerechtig, d'n oproop had rizzeltaot.

Vief dames góng de oetdaging aon en hōbbe hun ierste optrejjes al mètgemaak.

Ein vaan de take vaan de Kachelpiepers is 't verzörrege vaan de Prinsewach op mominte tot d'n Hoeglöstigheid vezietes aflègk.

Tot dit jaor waore veer geweend tot daan 'n aontal stevige jonges aongetroje stoonte. D'n Hoeglöstigheid vaan aofgeloupe vastelaovend, Prins Tom I, had evels 't veurrech um begeleid te weurde door 'ne prinsewach dee oet allein mer dames bestoond en 't moot gezag, dao boe nudig stoonte zie hun menneke ..... ekskuseer hun vruike.



## Inhole

Nao veer weke tot in alle oetheuk vaan Mestreech op viziet te zien gewees, waor op zaaterdag 21 fibberwarie 't momint gekoume um 't rokkestuum te ruile veur 't sjiek Bourgondies kestuum. Veur de prinselike sjefäör Math Costongs is dit ein vaan de röstige daog. Heer hoof d'n Hoeglöstigheid jammers allein mer bij de Lijnwèrkplaots vaan de N.S. aof te lievere. Vaa dao oet deit d'n trein de res. Veur tot vertrokke woort riechting Mestreech-centraal, waor iers 'n oontvangs in de Lijnwèrkplaots. Nao inspeksie vaan d'n trein en 't oetrike vaan e boetemodels treinkeertsje, vertrok 't gans gezèlsjap riechting Stasie mèt de prinsekinder es vollierde machiniste vää op de bok vaan d'n trein.

Aon de Stasie stoonte de Worteleboere vaan Wiek 't Hoeglöstig gezèlsjap al op te wachte en oonder hun muzikaal begeleiding góng 't riechting stationshal boe de chef vaan de stasie de Prins vaan harte welkom hède. Nao de sirremonie protokolair, temidde vaan 't reizigerspeblik, waor 't tied um riechting Merret te goon.

Dao woort iers nog de patroenes vaan de Mestreechter Vastelaovend geierd mèt 'ne greuntekrans. En toen waor dao 't groet momint vaan de zwajeuzen entree in 't Stadhoes veur de machseuverdrach.





## 't Stadhoes

Mèt goodvinde vaan 't Mooswief, ze kós jammers neet aandere nao 't offerre vaan zoe'ne prachtige greuntekrans, kaom de Prins mèt de Tempeliers in 't Stadhoes terech. Wie geweend vaan aander jaore zaot en stoont de hal bomvol. 't Vollek vaan Mestreech stoont op de galerij en had vaan dao oet ziech op al die gaste die ziech, al daan neet mèt get foetele, 'n zitplaots in de hal hadde wete te regele.

De börgemeister, vruntelik wie altied, hède d'n Hoeglöstigheid en de Tempeliers vaan harte welkom um vervolges metein op de mansard acher 't spreekiezer te kroepe. Iers probeerde heer 't vollek vaan Mestreech nog veur ziech te winne en heel heer de ieregaste oet den Haag, de ministers mevrouw A. Jorritsma en d'n hier J. Ritzen es ouch de staotssikkertaris d'n hier W. Vermeend, veur tot ze bij 'n muijerij terech gekoume waore.



In 'n waterval vaan wäörd merkte de börgemeister op tot mevrouw Jorritsma, op weeg nao Mestreech, 't vlegveld weer links had laote ligke en kondigde heer minister Ritzen aon es eine oet d'n tied tot de lierare nog lès gaove op sjaol en neumde häöm " 't pientere pookje vaan Paors". Euver staotssikkertaris Vermeend, inmiddels vaste gas in Mestreech, vroeg de börgemeister ziech aof of de kemissie vaan verleije jaor neet waor euvergekoume? Wijer heel meester Houben zien Haagse gaste veur tot ze in 't boeteland teväöl Kokketeerde mèt 't poldermodel um dao metein aon touw te voge tot veer heij neet de arrogansie vaan de polder kinne, meh allein de ekspansie vaan de kolder. Niks is heij te dol, veer leve veur de lol.

Euvertuig vaan 't feit tot 't Kollelje 't good gedoon had in 't aofgeloupe jaor, kondigde heer mèt e gerös hart de nuije sirremoniemeister Jan Janssen aon es: 't nuije kenon vaan Prins Tom d'n toeker vaan de otoriteite de stum vaan 't vollek 't spreekiezer vaan de Mestreechter Geis 't stoorzenderke vaan de Mestreechter Vastelaovend d'n intellektuele mins mèt möts dee 'n nog noets gezeen muijerij zouw goon beraome.

De sirremoniemeister had 't peblik metein op z'n hand door de börgemeister te vergelieke mèt Pavarotti evels zonder



zweitdoek, want dee hōbbe ze jammers bijj de gemeente toch neet nudig. Mèt de gemeinteraodsverkezinge in ziech waor veur Jan Janssen 't momint aongebroke um de balans op te make of wie heer dat zoe sjoen zag: 't puntebeukske in te vōlle. Bijj de bōrgemeister vroeg heer ziech aof wie 't mèt dee z'n door-oontwikkele zaot. Ouch kraog de bōrgervajer 'ne veeg oet de pan inzakes 't nuijjaor winse door de drekmennekes.

Wethawwer Wim Kuiper, neergezat es 't stëlste jungske oet de klas, kraog 't advies mèt, um get mie aon image-building te doen. Heer mós ziech get mie tōsse 't vollek begeve en oetrope: "loup mer e sträöttsje um ... want iech bin wethawwer Wum, Tjsakka" Mèt 'ne veuroetzeende blik waor 't puntebeukske vaan wethawwer Armand Cremers alvas opgeborge oonder D 33.

Ouch de Haagse gaste woorte neet vergete. Zoe rappeleerde de sirremoniemeister minister Annemarie Jorritsma d'r aon tot wee "A" zeet ouch "2" moot zègke. Veur minister Jo Ritzen had Jan Janssen e gediech in petto:

Kiek ins dao, kiek ins dao, is dat minister Sjo  
dat is minister Sjo, dat hoor en zie je zo  
minister Sjo is dat gewend  
hij is de nachtmerrie van iedere student.

Terech konkludeerde de sirremoniemeister tot rechtens aw tradisie in de koumende dreij daog de mach aon de Prins kump um mèt belump en vaste hand 't Vollek veur te goon in de zwoer meh plezerige daog vaan Vastelaovend.

In 'n uterste poging um de zaak nog veur 't Kollezje te redde, zat de bōrgemeister



nog 'n oontvoering vaan de Prins in scène, meh ouch dat moch neet mie bate en moos heer ziech debijj neerlègke tot heer mèt zien wethawwers veur dreij daog kós vertrèkke. Es boetedoening kraoge de Kollezjelede en de Haagse otoriteite e sjaolpèkske aon compleet mèt sjaoltas en 'ne lollie veur in 't speulketeer. Ter kompensatie vaan 't feit tot ze noe veur dreij daog aon de kant woorte gezat kraoge alle otoriteite 'n prinselike medaalje umgehaange.

Es verdeenstelik Mestrechteneer woort Broeder Cunibert vaan de Broeders vaan de Beyart naor vāore gehaold en in 't zōnneke gezat veur ziene jaorelange belangelozen inzat veur de jāög vaan voetbalvereniging Rapid en ouch vaanwege 't feit tot heer bij vāöl bejaorde de hāöfkes oonderhèlt.

De machseuverdrach woort beslote mèt 'ne gezèllegen oonderein en 't drinke vaan d'n iere-wien in de Kollezjekamer.

Aonsletend voont in de aovendore nog 'n zier drök bezekde Prinseresepsie plaots in de Festi-Village boe e paar hoonderd maan mèt 't oetrike vaan 'n prinselike medaalje bedaank woorte veur hunnen inzat veur de Mestrechtter Vastelaovend. En in de kaffees waor 't drök tot in de late eurkes. 't Waor dudelik, Mestreech waor veerdig um Vastelaovend 1998 te viere.



## Vastelaovendszoondag

Op 'n, veur 'ne zoondag, tamelik vreug oor woort de naobersjap vaan d'n Hoeglöstigheid door 't muzikaal geweld vaan de Kachelpiepers oet béd getrommeld um prizzent te zien bij 't oethaange vaan de veendel aon 't Prinselik Pelies in de Cluynshofstraot op nummer 11. Nao inspeksie vaan 't Garderizzjemint, 't völle vaan de tönnekes vaan de merketensters en 't opspaange vaan 'n aantal medaaljes, woort riechting Vriethof gegaange.

Tege twellef oor gónge Prins, Tempeliers en nog 'n aantal genudigde vaanoet de Momus riechting plateau aon Sintervaoskèrk boe de Marchal-vunkeleer alles in gereidheid had gebrach um de èllef sjeut te losse.

Oondaanks 't get benkelik weer waore toch doezende luij oppe Vriethof prizzent um getuige te zien vaan 't insjete vaan de Vastelaovend en 't oprèkke vaan 't Mooswief.

Wie de tradisie veursjrijf waor d'n ierste sjeut veur de Prins. Nao de veerde sjeut woort 't Mooswief opgetrokke en kraog Prins Tom I vaan de Mooswifkes vaan St. Peter 'ne sjoene kórref St. Pieterse greunte aongeboje. Ouch woort nog de beneumingsproklamasie vaan de Vastelaovendsvierders 1997 veurgeleze.



En toen begós 't sjendaolig hel te regene. In 'n mum vaan tied waor de Vriethof leeg en waore de kaffees vol. Veur vääöl luij eve e momint um ziech veur te bereije op de groeten optoch.

Zoonder de gebruikelike reklaam-optoch begós um keteer veur twee 'ne boonte stoet vaan wagele, boonte störrer en zaate herremeniekes aon, wat later zow blieke, de langs dorenden optoch in de historie vaan de Mestreechter Vastelaovend. 'ne Stoet vaan 60 aangemelde gróppe aongevöld mèt doezende vastelaovendsvierders trok dweers door Wiek euver de Aw Brök via de Vriethof nao de Merret boe de lèste wigel pas in d'n duuster aonkaom.

Nao 'n oontvangs in d'n Tejater waor nog eve tied um 'n hepke te ete um daonao aon de cramignon te beginne. Veurtot veer d'r erg in hadde waor d'n ierste vastelaovendsdaag al weer veurbijj.



## Vastelaovendsmaondag

Tege 'n oor of èllef woort Mestreech weer wakker en maakde ziech gereid veur de groete rijaloet dee veer Familie-optoch neume en dee ziech vaanaof 'n oor of driij vaanaof de Hoegbrökstraot 'ne weeg zeukde nao de Vriethof.  
 't Weer wèrreke gelökkig mèt en oonder e straolend zönneke woort Mestreech bedolve oonder doezende en doezende manjefiek verkleijde vastelaovendsvierders. Veurtot Prins Tom I evels aon de kop vaan de familie-optoch door de straote vaan Wiek nao de Vriethof trok, had heer iers nog e bezoek gebrach aon de kraanke kinder in 't hospitaal en dao, boe meugelik, get vastelaovendsplezeer gebrach. Tegen 't ind vaan d'n optoch woort nog eve get rech gezat, wat d'n daag daoveur oppe Vriethof jaomer genóg de mis in waor gegaange.  
 De Vastelaovendsvierders 1997, Menno Eisenga en Yvonne Vromen, kraoge oet han vaan de Prins 'ne replika vaan 't Momuskenon oetgereik.  
 s'Aovends woort weer de cramignon geloupe en 'n aontal kaffees bezoek.



## Vastelaovendsdinsdag

D'n derde Vastelaovendsdaag woort in beslaag genome door twee groete eveneminte. In de Festi-Village waor weer de kestuumwedstrijd veur de kinder. Aon belangstèlling had me dao gei gebrek. In 'ne bomvolle zaol had 'ne zjurie de zwoer taak um e keend mèt 't sjoenste vastelaovendspekske oet te zeuke.  
 Op Merret, Slevrouweplein en Vriethof voont 't Zaaite Herremeniekeskonkoer plaots. Um 'n oor of èllef waor de zjurie al bijein in de Momus um ziech te pripperere op de zwoer en wiechtige taak um veural ierlik en zoonder umkouperijj alle herremeniekes te zjurere.  
 Um twellef oor prizzenteerde ziech Sous Bras Band Tête de Veau oppe Vriethof veur 't innumme vaan 't aon hun touwgezagde ontbijt.  
 En boe aandere woorte zie op getrakteerd?...zjus... op 'n poorsie tête de veau. Tege twee oor kaom 't ierste vaan de 62 zate herremeniekes de Vriethof opgemarsjeerd um ziech veur d'n hoofzjurie te prizzentere.



Ouch dit jaor waor 't alweer bekans duuster wie de lèste muzikante ziech lete zien en veural hure.

De zjurie waor 't, nao get ge-ensel, toch weer eins gewoorde, alle herremeniekes kraoge d'n ierste pries.



## *De lètse minute....*

Zoe ongeveer um keteer veur twellef zaog me oet alle heuk en kante de vastelaovendsvierders riechting Vriethof trèkke um getuige te kinne zien vaan 't neerlaote vaan 't Mooswief es teike tot de Vastelaovend weer veurbij waors. Binne de kortste kiere stoont de Vriethof bomvol, tot in de buim zaot de jäög um mer niks hove te misse. Jao zelfs bovenop 't daak vaan 't kioske zaote de vastelaovendsvierders.

De Prins sprik 'ne lèste merci tege de luij.

't Mestreechs Volksleed weurt gespäöld en oet volle boors mètgezoonge en daan, zjus wie al zien illuuster veurgengers dat hōbbe mètgemaak, is noe ouch veur Prins Tom I 't momint aongebroke um zien Prinsemöts en Scepter in te lievere bij de Prizzedent vaan de Tempeliers.

Ouch de Tempeliers oontdoen ziech vaan möts en plakkèt, 't is aofgeloupe, veurbij, Vastelaovend 1998 zit d'r op.



## In Memoriam

### Bertien Thewissen

Begin november 1997 bereikte us 't beriech tot Bertien Thewissen gestorve waor.

Oonder begeleiding vaan 'nen doejewach vaan hoesdaeve woort Bertien herdach tijdens 'n zier stijlvol Mès. Daonao woort Bertien begraove bij häöre Frans. Vääol daank zien veer häör versjöldig veur 't feit tot zie häöre Frans, es mèt-oprichter vaan de Tempeliers jaorelaank door dik en dun gesteund heet in zie werrek veur de Tempeliers.

Ouch häör hoese waor 'n toes veur eederein, de deur stont altied ope, me kós altied bij Bertien terech veur e präötsje of 'ne gooje raad. Bertien bedaank daoveur, adie!!



### Fons Bonnemayer sr.

Vlak veur de Keersmes kraoge veer 't beriech tot uzze Tempelier Fons Bonnemayer sr. gestorve waor. 't Beriech kaom neet gans oonverwach, meh toch, veer zalle Fons misse.

Es veurzitter van de kemissie Boetegebäöre waor heer jaorelaank de stuwende krach achter de organisatie vaan de vastelaovendsoptochte. Mennige prinsewagel heet heer oontworrepe en mèt opgebouwd.

Gere hadde veer nog hiel get jaore gebruik wèlle make vaan de deskundige advieze vaan Funs.

Jaomer genóg geit dat neet mie, Slivvenhier heet aandere beslis.

Funs, adie en bedaank veur diene jaorelangen inzat veur de Mestreechter Vastelaovend.'



### Wessel v.d. Vaart

Op 4 juni 1998 bereikte us 't beriech vaan de plotselingen doed vaan uzze börgermètwerker Wessel v.d. Vaart.

Wessel steit in us memorie gegrif es mèt-oprichter vaan de Kachelpiepers. Jaorelaank waor heer lid vaan d'n hoofzjurie vaan 't Zaaite Herremeniekes konkoer. Ouch bij de reklaamoptoch waor Wessel geinen oonbekinde.

Heer gunde ziechzelf gein rös, altied onderweeg, noets te beroerd um get te regele.

Wessel bedaank veur dienen inzat veur Mestreech en de Mestreechter Vastelaovend.

### Lou Duysens

Es kunsteneer en kunsinker heet Lou jaorelaank zien kwaliteite ingezet veur de PR-kemissie vaan de Tempeliers. Mèt plezeer en creativiteit heet heer mètgewèrk aon 't tot stand koume vaan de vastelaovendsgèzèt D'n Tempelier boe heer neet allein de teikeninge veur lieverde meh ouch de tekste. Datzelfde gold ouch veur de D'n Oprechte Mestreechter Kelender.

Lou wis altied de sjoenste sjelderije oet te hole. 'n Kregende is häöm te mechtig gewoorde. Veer hóbbe aofsjeid mote numme vaan uzze vrund Lou. De kelender vaan 1999 is postuum aon häöm opgedrage es ierbetoen veur wat heer veur de Mestreechter Vastelaovend heet beteikend.



## De Tempelers

### **Besjerremhier**

Mr. Philip Houben,  
börregemeister vaan Mestreech

### **Protektäörsraad**

Mr. Ph. Houben, veurzitter  
Ir. D.D.P. Bosscher  
G. Brouwers  
Dr. K. Dittrich  
P. van Dongen Torman  
Dr. Ir. J.G.M. de Jong  
Mr. Dr. A. Lutters  
M.M.J. Mourmans  
Ir. H.J. Nijhuis MBA  
Th.G. Westgeest

### **Ieretempeleer**

Jacques Vijgen

### **Senaat**

Dré Abrahams  
Giel Arnoldi  
Jan van den Bergh  
Fons Bonnemayer sr. †  
Loe Buytendijk  
Henk Doorenbosch  
Herman Frantzen  
Willy Hageman  
Vic Kamm  
Math van Lijf  
Pie Steffens

### **Bestuur**

Wim Fischer, prizzedent  
Jean-Louis Tuinstra, vice-prizzedent  
Raoul Veugen, kretser  
Willy Fey, habsjaar  
Bert Beenkens  
Chrit Leenders  
Willy Massot  
Raymond Willems  
Funs Wolfs

### **Lede**

Fons Bonnemayer jr.  
Frans Botty  
Frans Buytendijk  
Lon Cimmermans  
Rob Dohmen  
Maurice van Engelshoven  
Pol Feron  
Servé Feij, sikkertaris-ginneraol  
Han Hoogma  
Jan Janssen, sirremoniemeister  
Robert Jessen  
Frits Jongen  
Henk de Jong  
Nico Kempeners  
Funs Kerckhoffs  
Loe Lausberg  
Jef Loontjens  
Luciën Schreurs  
Boy Olivers  
Fred Sleebe  
Lou Vleugels  
John Zeguers

### **De organisatie**

#### **Kemissie Binnegebäöre**

Raymond Willems, veurzitter  
Marion de Bont  
Frans Botty  
Ursela Garnier  
Mia Groebbé  
Monique Hamelers  
Noël Jaegers  
Anneke Janssen  
Henk de Jong  
Huub Jöris  
Lizette Keil  
Paul Keulemans  
Rens Lasoe  
Susanne Loontjens  
Jef Persoon  
Pol Persoon  
Roy Ploum  
Christianne Quadvlieg  
Luciën Schreurs  
Fred Sleebe  
Peter Stroes  
Patrick Ummels  
Etienne Vroemen  
Henk Weerts  
Maddy Weijenberg  
Lewie Wilhelmus  
Evert-Jan Zelders

#### **Kemissie Boetegebäöre**

Willy Massot, veurzitter  
Giel Arnoldi  
Fons Bonnemayer jr.  
Rob Dohmen  
Henk Doorenbosch  
John van Dijk  
Peter v.d. Eerden  
Maurice van Engelshoven  
Pol Feron  
Leon Herben  
Han Hoogma  
Frans Jozef Jansen  
Jan Janssen  
Hans Jongen  
Nico Jongen  
Nico Kempeners  
Math v.Lijf  
Jef Loontjens  
Peter Schrijen  
Pia Smeets-Kersten  
Twajn Vermin  
Raoul Veugen  
Jacques Vijgen

**Maggezijn**

Pie Dassen, beheerder  
Harry Aerds  
Leo Beckers  
Frans Boesten  
Jacques Cramer  
Jan Hameleers  
Hans Hollanders  
Michel Jungsleger  
Willy Massot, directeur  
G. Roquet  
Math Schellingen  
Charles Walthie

**Sikkertariaot**

Raoul Veugen, kretser  
Harold Dello  
Mirjam Geelen  
Nico Kempeners

**Kanselarijraad**

Bert Beenkens, veurzitter  
Servé Feij, sikkertaris-ginneraol  
Jan Janssen, sirremoniemeister  
Robert Jessen  
Jef Loontjens  
Boy Olivers  
Jean-Louis Tuinstra  
Raymond Willems

Math Costongs, sjefäör Prins  
Andrew van Thor, sjefäör Tempelers  
‘t Garde Rizzjemint “de Kachelpiepers”

**Finansjeel kemissie**

Funs Wolfs, veurzitter  
Jan van den Bergh  
Willy Fey  
Willy Hageman  
Paul Hardy  
Robert Jessen  
Miel Keerssemeeckers  
Funs Kerckhoffs  
Lou Lausberg  
Boy Olivers  
Ed Strijp  
Jacques Vijgen

**Loterij- en industrieaksie**

Funs Wolfs, veurzitter  
Lou Brans Brabant  
Willy Hageman  
Peter Harkema  
Miel Keerssemeeckers  
Rob van Leendert  
Math van Lijf  
Math Schoenmaeckers  
Servé Tillie  
Eugène Vingerhoeds  
Breur Weyzen

**PR-kemissie**

Chrit Leenders, veurzitter  
Raymond Bermans  
Trudie Bosch  
Frans Buijtendijk  
Rob Christiaans  
Lon Cimmermans  
Ton Dello  
Tacco Eisenga  
Breur Gulikers  
Frit Jongen  
Marjan Melkert  
John Niessen  
Ted Reckman  
Katja Rodts  
Lizette Stallinga  
Ed Strijp  
Raoul Veugen  
John Zeguers

**de Trekkers**

Servé Meerten, veurzitter  
Raymond Bergmans  
Ralf Caenen  
Hennie Coenen  
Ton Dello  
Jos Detisch  
Guido vd Dijck  
Rinus de Groof  
Vic Hupkens  
Francois Pletsers  
Marcel Rassin  
René Stallinga  
Ed Strijp  
Peter Stroes  
Jacques Vijgen  
Marcel Zeegers



## Epiloog

De Vastelaovend dee geer noe nog ins op pepier hōb zien passere, waar neet meugelik gewees es veer neet de steun hadde gehad vaan:

- \* B&W en de Gemeinteraod vaan Mestreech;
- \* Peblieke Werreke, Brandweer en Pelisie;
- \* Regionale Brandweer en G.G.D.;
- \* Börgermètwerkers in kemissies en sub-kemissies;
- \* Ederein dee door de finansjele en aandere steun de ranzjasie vaan de vastelaovend meugelik heet gemaak.

spesjaol danke veer 't VOLLEK VAAN MESTREECH !!!!

De jonges vaan Peblieke Werreke wèrreke veur uuch en us wie veer vastelaovend vierde. Hiere .....BEDAANK veur euren inzat !!



Veur al eur bouwplanne . . . . .  
Bouwbuuro Beenkens . . . . . tot euren deens !!!



## *Colofon*

Oetgaof

De Tempeleers  
Prins Bissjopsingel 6  
6211 JX Mestreech

Samestelling

Tempeleer Nico Kempners

Oplaog

700 stöks

Fotoos

Foto JoTa

Foto pag. 27

B. Abrahams

Ontwerrep umslaag

Ted Reckman

Drök

Wijntjens Drök Mestreech

Mestreech, 11 november 1998